

VIDIPO VICHĀDAMU VICHAVAMYUJŪRA CATERA

**Pávurubay nuýadara catera
tanuvunujuvimosiy ruumujū, Vidípo
vichādamu siityariṽavyedabay**

1 ¹Ray Pávuru, Timutévuta, nañiday Jesucrístu muchechijyuy, nañurya catera jiryejyū, Vidípo vichādamu vichavay, jiryatiy sajiintyāda Jūdenu jiyū jirye, jiryatidye vicha samirya varyy Jesucrístu jmūtyādata. Namyuchuvay jirye, jiryinūtyavatya, jiryimūtyavatya jarye. ²Samirya vichāda racha jiryejyū, samirya racha jiryejechintyi, Vujye Jūdenumusi, nutyityū Jesucrístumusi jarye.

**Pávurubay tūchoda Jūdenujsā,
siityariṽavyeda jiyadaju**

³Nuñi rajechipityajasara jirye, ričanatyate variñi rindenu. ⁴⁵Ratyuchusaratiy sisā Jūdenu, ratidye vata siva tara jiryejyū, ričanay jaryi varyy jiryatiy jiryivaajeyasara risā, samitūchoda datyadodamu, rajotya rundamusiy, diyesaraju. ⁶Diye jita radyetyate darya: “Sajtotanichara Jūdenu jiryivara jiryatiy sajotāda jvaayada samiryara; sajtotanichara Jesucrístu rundamura, šanumaty jtišarantiy.” ⁷Daryaniday rañi jachipiyā jiryenchiy, jiryatiy rajechipityajā jirye daryaju, rinūntyi nutyu jiryimūtya mityiji risajura Jūdenu jantyutyāda dañuma rañicha tanuvunusi, dañuma

ratyūchu rayada samitūchodantiy, riṽay varyy: “Rañi jita šitenu.” ⁸Sadatya jita Jūdenu, ray jita šitenu nuway jirye, Jesucrístu jachipiyajadata ravyāta jirye.

⁹¹⁰Rajechiñūy siva Jūdenu jiryeyadaju: “Yajasachutityirya rivyātara jiñijyū, riryatidye vata varintiyiy; yašay varyy datyāda risajuriy, jachipiyajada jarye, riryatidye datyajayasara samirya jaryetāda, ne juuchatavary riryēcha varyy, ne ti ratūchuta variryi, Crístu rundasaraju, šanumaty jtišarantiy.”

¹¹Rajechiñūy siva jiryeyadajuntiy: “Yavichataniy samirya vichādariy, nutyu jivyatatiy riryēcha daryā, jiryatiy vūvyichasara Jesucrístu jmūtyādata, riryatidye jchanatyā nijyanvay varyy ji, Vujye Jūdenu, rašatyityi varyy vanda yiva.”

**Pávurubajyū, Crístu vichasara
savichāda tītaju**

¹²Ratyuchurūy jiryiva, jiryatiy ratyeryiveda jirye, nurya ravyichati, nuryamusiy rañi tūchutityirya samitūchoda jaryi. ¹³Jiryatiy tanuvunusi rañicha, jiryatiy rachiityari daryajuni Crístu, niṽiy vichasara Jūdenu jaryeti, riñi datyamā tītaju jiryatiy rivyicha jamu nutyityū roriquisumamu: “Pávuru jita vicha tanuvunusi,” ridyetyamā tavay nijyanvay varintiyirya. ¹⁴Jadchintyi rajuu vutyeryiveda, jiryatiy

Nutyityumu vutyeryiveda daryi, riñi jita vanutya ratyanuvunusadatayu, tapi ridyetya rachiityarini Crístu daryaju day, ridyetanutityi jichuvuyasadamusirya Jüdenu niquejada jaryi varyi, ne nutyu taridye.

¹⁵⁻¹⁷Tavay rityevay jita datyanu sanchiy, Jüdenu jaryeti Crístunchiy, rinnuyadamu yavatyaryu riva ray, riryamucheniryuy riva risaju ray. Rityevay datyanu Crístunchintiyi, riñi jita datyanu samirya jachipiyajadata, rivyatadamu, ridyetya daryaju: “Pávuru jita rañicha samituchoda jiyada ráñu.”

Tavay rityevay datyanu Crístunchiy, mitya jiyu, ne vinu riryatidye tuvachu nijyanvay Crístumu. Riñi jtay yajarupanta jaryi riva ray, ratyanuvunusajomu.

¹⁸⁻¹⁹Dañuma dyetya racha darya, vinu jiryatyi ridyetyanu Crístunchiy, richanay, varimyata jarupadodaju, varimyata samirya jachipiyajadaju, raday jchanatyatityintiryay, radyetya daryaju, ratitunu rayada rayadaju, jiryeñumatiy tuchu sisa Jüdenu rayadaju, sanumatiy vanutya Jesucrístu Jnutu risaju ray. ²⁰Daryanuma rañiruyadamu, rayntuyadamu jarye, ne rãda taranchiy mitya, rantya tuchu vijyomujache Crístunchiy, nutyu ratyuchusaratiy tarintiyi, riryajachipiya nijyanvay sanijyu Crístu varyi ramusiy, nuryamusiy ravyicha saju, nuryamusiy radiiy sajuntiy. ²¹Tapi rajyu jita titajuni Crístu day, rinuyadasaraju; radyiadamu jita racanay jaryinravaju. ²²Variñumatiy raryi jiriyi jnyada riva, sajmutya Jüdenu riy nijyanvay, rivaayadamusiy. Ramutimyü ne radyetya nutyura rajaryeta. ²³Ramecho paruchariy rajechipiyajadamusiy varyi, tarademusiy rañi diryuy jiyusiy, ratidye vicha sisa Crístu, samiryavaju racha varyi rajyu. ²⁴Tajidyemyusintiyi jita,

jaryi samirya jiryejyu ratidye macho riva. ²⁵⁻²⁶Radyetya, sitenu jita ramacho jiryisa, rariche varyi jiryisantiy, ratidye jmutyara jiryetyuvachoda Crístumu, jiryatidye jchanay simu varintiy, rajasachutityi varintiyirya jiryichanatyada sanijyuntiy, ratyi ramuti junay jiryimu.

²⁷Vinu jiryantya vichasiy samirya, riryatidye tuvachu nijyanvay ramu samituchoda, ratyi jto jiryimu, radiy varyi riva jiryevyichada, ratyi vicha tajijyu, ratuvachu jiryenchiy varyi: “Riñi jita vanutya vinu taraqui jachipiyajadatayu, riryaniy surra mityajuusuma riryajiju jimyityasivyeda, rivyanutya taraqui jachipiyajadatayu, jiryatyi ridyetyanura samituchoda nutyu saray Jesucrístu vuryeyada, vüñumatiy tuvachu varyi simu. ²⁸Ne richuvuy rimyomusiy jimyityasivyeda, mitya.”

Nurya ratyuvachuruy jiryenchiy. Jiryatyi ne jiryechuvuy jimyityasivyeda momusiy, ruvatanunuma varidyeryi, jiryejyu jita ratiche ramityada Jüdenumusiy, jiryeyada rayadaju. ²⁹Ne yinuy sasayada Jüdenu vurya, ne vinu vutyuvachoda simu Crístu, sasayadantirya paruchariy vichada sayadajuntiy. ³⁰Daryanuma jirye jita parutyajaya sayadajuyu, nutyu jiryeñi diyadama tariy rivantiy, diye jiryetyuvachuntiy diyesaraju rapyarutyajayasara ray.

Crístu bay nutyu muchechijyuyu, sajay jita rajchanatyata tamityayu

2 ¹⁻²Jiryetyi vanutyadatavay Crístumu, jiryatidye jachipitya savatadamu ray, jiryajchanatyaniy varirye, jiryatyi jiryejchepiyasara mityiji, jiryevyatasara nuñi jiryedyeyu. Vutyi jmutya mityijirya Jüdenu Jnutu datyadoda, jiryatidye jachipityaja

varirye, jiryajantyutya variy risajuntirye, jiryantya jachipiya darya jachipiyaadada, mityiji jiryajachipiyaasara. ³Ne jiryavata vinu jiryeyyu taranachō, ne jiryajachipiya vinu jiryenijyu varintyi, ne jiryajchanatya nuñi tiquimusiyu, samirya jachityavay jiryajnyu tavañecho, jiryajachipiya variy: “Riñi jita jaryinravavyaju vuryimusiy.”

⁴Jiryajnyutya yisa vichavay baryan-tidye, ne vinu jiryeberya yajnyutya.

⁵Daryaniday sajachipiyajada Crístu, daryaniday jiryajachipiya jasintidyde.

⁶Nutyu Jüdenü savichanuyada, ne sajachipitya jiryedara jivyichada jidchavü jiyetya nuday. ⁷⁻⁸Santyudoda jita variyu, savichadeda variy muzechijyuyu, nutyu nijyamü sarupeda variy. Nutyu mitya nijyamü nta savichada variy, satituyada variy muzechijyu, savichanuyada siityera variy jiyeyyu, jidyiyadasaraju, jiryatyi jaryi juvajadasara diiyada ravichada, crusityasa sasotadeda sidyavu daryajuni.

⁹⁻¹⁰Ramunütiy sasumityadeda sajay Jüdenü jaryinrajyuyu, titaju tara jiyujusaraju, sabayada variy sityaju, ne tara jnay ratarya jtya jidchavü daryaju mitya, nutyura sabayada saju, riryatidye datya nijyanvarya sitya Jesús jtyata: jiryatyi sitenu nutyityu dañi Jesús day, riryajadasinu jita variy sanchojyuyu, riryajadasinu titajyuyu, jiryatyi jarichumu vichavaryi, mucomu vichavay jarye, mucadijaryi vichavay jarye risaju.

¹¹Jachintyi riryatychu vijyomujache, titaju niquejadatavarya: “iJesúcrístu jita sitenu nutyityu taarye!” Jchanatyasi sachasara sajay Jüdenü variy.

Crístu siityarivay vichasara nutyu noño jiryia mucadimu

¹²Daryaday jita, ravyatavay, daryatyi jiryechiityeñuyada tarintyi, ne vinu

ramyutijadamu, diye jita ribivajuntiy, jiryajvaatyityi sisa Jüdenü, jiryeyada rayadaju, jiryechuvuyadanube, jiryemyichutyedanubentiy. ¹³Ne yinuy ninü jita jiryevyanutyä day, jiryatidye jvaaryurya samirya jvaayada, jiryatidye jvaay varintyirya ratiy samirya saju. ¹⁴⁻¹⁵Titaju jiryivaayadamu ne jiryacucutyayu, dantyamuy ne jiryaniquetta rivayu, jiryatidye vicha samirya vichavajyu, ne juchatavay jiryecha variy, riñuma tuchuta tariva jiryä, jiryatyi Jüdenü dadyeñu daryaju jiryedyde. Jiryatyi jiryevyichasara riquebyiva varuyu jachipiyaavay, vacha vichavay cabyimu jarye, jiryanononuy rijyura Jüdenü nü. ¹⁶Jiryenononutya navarya Jüdenü niquejada tarijyu jnyutya. Crístu jtijada rundamu rajchanachara, jiryatimyu ne ramachō radyetyadoda mitya variy, jiryatyi parucharimysiy radyetyadoda daryaju jiryä. ¹⁷Temusiy dyetya rarumichara rayndaja Jüdenüyu, ramyunusada rundamu, vuryatidye jtotanirya jiryecheyada, jiryatyi jiryecheyada Jüdenüra jiryinuyada variy, simu tuvachodamu; daryamuni richanay, richanay variy jiryenijyuntiy. ¹⁸Jiryä jitantiy rajchanay, jiryajchanay variy rañijyuntidyde.

Pávrubay jparuyada nada Timutévujube, Epájruditubatyä

¹⁹Riparuy jitanü Timutévu vanira jiryimu, Vuyntyityu Jesús jmutyadada riparuñi, ratidye jchanay rantidyde, rañumatyi datya nutyuranuma jiryenijcha. ²⁰Rañi jtay rajpanü Timutévu, ne ti jnay daryaju nutyu nitiy darya risa, nitiy rajnytasara jiryä, sitenu jachipiyaadada. ²¹Tavay titaju vata jivyichadajuntidyde, ne rivyata daryajura Crístu vatara.

²²Jiryedyetyama jitarä Timutévu

vichada samirya, nutyu sivaay siityera risa, nutyu vudyenu jvaay darya vuryisa, samituchoda datyadodamu sivaay risa. ²³Nini jita riparutye vanira, ranumatiy datya nutyura racha rajyu. ²⁴Raňi jtay Nutyityu jmutyadata rajiya varenu jiryimuju.

²⁵Darya ritay samirya jiryejyu, ratiy jpani vutyeryi Epájruditu jiryimu. Nini jita jvaay mityiji risa, parucharimysiy. Savichanuyada jita jiryipanu rimujuntiy satidye jnyu ranacho ravyatara, jiryibivaju. ²⁶Sanuvayadamu jita jichepiyajada jiryeňijyu jiryatij jiryetyuvachumara sdivajada. ²⁷Sitenu jita sdivajada, vadiiryode sarabejada variy. Judenu jantyutyadate varitye ni, ne vinu ni, darya santyutyada varintyrye, saňuma jasachu raňuvayadanchajura raňuvayada. ²⁸Vaniravaju ripate jiryimujuteni, jiryatidye diy junay sivantiy, jiryatidye jchanay variy, variňi jitamuy ne rajachipiya jaryi variñuday. ²⁹⁻³⁰Ramutiy jiryadirye samirya Nutyityu vatadamuni; jaryi jiryichanayadamu jiryadirye samiryanj. Jiryantya vata jaryiryi tavay sisajuntidye, nutyu ni vicha daryantidye. Nini jita tuudiyadara diiyada, satidye jvaarya Cristu vatara, sayatadara jidyiyada satidye jtotanirya jiryimutyada yibiva, jiryatij jiryechutyeda jiyusiy.

Sitenu vase vichada

3 ¹Ranique tamitya jiryivara, ratyeryiveda, jiryantya jchanay simuju Nutyityu. Ne parutyadamusiy rajetyi nyadara darya niquejadantiy, jiryejyu jita samirya darya.

²iJiryinutyatata riryajisij jivye nibyimiyu! iJiryinutyatata riryajisij jivye vacha datyanuvayu! iJiryinutyatata riryajisij jivye jivyu

nusiyeyadacanamintiyiyu, rityi jmutyotutadedara jivyu Judenuju! ³Tapi vuňi jita saranusavay Judenuju vutyi jachipiya sitenu sanijyu, sitenu vujechitya, vutyi jchanatyasaranj Jesucristu, vutyimiyu ne tuvachoda ramu vuvyichada vuryeyada rayadaju, vuryivaayadamu jarye ne vutyuvachoda. ⁴Ray jita tuvachu jaryi ramu ravyichada, rivaayadamu jarye, rayada rayadaju. Tityi jtay jityuvachu ramu, ray jita jaryiñuvaju. ⁵Sumutyonutadedate rajyebetyera ravyu, mumurundamiňijyatemusiy raryupedivasyi. (Ramusiy sadyadoda rajyebetyera: “Radyenu jita Judiyute day.”) Jadchij jita Irayenu nijyamj darye, jiryatij savichanuyada ramyunatyj Irayenu, ririñu jita Myjamj, jiryatij Irayenu denunj, samij datyasi. Nutyu rajyebenta raňiquera Ebrévu niquejada, rariryjadantirya tarij rajyebe vichadantiy. Muisésibe jtedamu jita ratyuvachoda samidye, nutyu ridyetyadoda Varyiséyavedara. ⁶Judenuju rivaaryuyadamute, rayasantanumayajada rij Jesúsnu tuvachuvay, mitya riteda Judenu mityasivyeda daryi. Samirya vichasadamuntiy, jiryatij tarij sadatyadoda Muisésiberya, ritotanimya titajura. ⁷Jirya titaju jiryatij samirya ravichanuyada jaryi rajyu, rajechipumya varicharaju darya, Cristu jiyasachij rajechipurya. ⁸⁻⁹Sitenu jita rajechipuy titajura, ratidye datya samiňi Jesucristu, nitij rayntyityu. Rani jita samirya sitenu titaju, ne tara ntate rasara nundy. Cristu jiyasachij rantyuyada titaju, nutyu rujyuu jatyasara rinuy ranacho, ratidye canañi Cristu, rayada rayasiju, satidye diy Judenu jidchavu sisaju Cristu variy riva. Ne ravyata sadij samirya vichara riva, vinu jiryatij ratyuvachoda radyirya

sutedamu, jiryatiy Muyisésibe datyadodara. Daryaday ravyata sadiy samirya vichara riva, jiryatiy ratyuvachoda simu Crístu, jiryatiy Jüdenu say vurya samirya vichasara, vutyuvachunumatiy simu. ¹⁰⁻¹¹Ramusiniñday radyetyaryu samiñi Crístu, daryaday radyetyaruntyidyerya Jüdenu datyadantidye, ratatiy samisadedada diibymusiñi Crístu, daryaday raparutyajayasara rayaruryamuntidyerye, jiryatiy sarayada Crístu parucharimysiy vuryeyadantidye, jaryi radyiiryuy variy nutyu sadiiyada Crístu daryantidye, ratyi saryesara varirya raryi miša darya diibymusintyidye.

**Parucharimysiy vuryitotaniy
jvaayadara Jüdenu vatara**

¹²Ne raryi didyerya samirya vichasara rimuju didye, ne rito ramu juuchajša vichada didye. Vaniravaju jaryi raryiryurya jirya samirya vichada rajyu, ne yinuy ramuju sireda Crístuntiryey. ¹³⁻¹⁴Ratyeryiveda, ne ritay tara: “Ririmya rajyura samirya vichasada.” Ritatyey jita: “Rajechiputyityirya rivaayada, risijyunuma darya, vanira rinta ranacho ray jiryatiy rasutye rivaayada rajyu, ratidye juriy varenuvajura ravyatara, samirya vichasara, ratidye jmutya variy Jüdenumusirya samurichedoda, jiryatiy sanatuy variy jarichumuju ray, Jesucrístu rayadamuju.” ¹⁵Jamyityi jiryecha Crístumu tuvachodamu, daryaday jiryajachipiyantidye. Tajityi jiryajachipiya varidye, ranchiy jita sadityanu Jüdenu jiryivayu. ¹⁶Dañuma rumutiy vuryitojada samirya vichasadamu, vuryasiityarira darya vichada varintyi.

¹⁷Daryani jiryajvaayasiy rañiyarejuntidye, ratyeryiveda, daryatiy

rivaayada tarintyidye. Jiryajnyyasiy samiryi, rityi vichanujeya nutyu nvyvichada daryantiy, jiryatidye datya variy: “Nurya rajvaay.” ¹⁸Nutyu ratyuchujayajada jiryivara, rajatyi tuchoda jiryivantirya, rinayadanube ratyuchura: “Jaryi rajuu rivyichasara Crístu crusiy mityasivyeda.”

(Jiryatiy sabatye Crístu crusityasa vujyuuchueda jiyadaju, ranchiy vudyetya: “Ne samirya juuchuedamu vichada.”)

¹⁹Jivye crusiy mityasivyeda jita batyisavadye, tapi vinu ripyudenijyu jjechepiya Jüdenu jiyasachidye, riichanaty variyu, varityi ruvaarya jadasarate day, rjechepiyajada ranijyu mucadincha vichada.

²⁰Vvyvichada jita jarichumu day, rumusiñi jita vuryanutuñi vuryeyada rayasi, jiryatiy Vuyntyityu Jesucrístu dañi. ²¹Nini jita ratitunura vuvyurapurya, nutyu savutiy daryantiy, vandavu, ne diiyasavay vuryechasara variñuday. Saťitunura vuvyu jidyetyadata, ratatiy sasaboniy titaju jijyu.

Vuryajchanachara simu Vuyntyityu

4 ¹Ramunıtyi ritay jiryiva ratyevay: Jiryasurutyaniy Nutyityumuy, sumutyadata. Jaryi ravyatasavay daryaju jiryey, jaryi rañuvachavay jiryentyi, jiryichanatyanimya ray jiryatiy jiryeniča rivaayada murichirya (ratyi jvaayada jiryeyadaju parucharimysiy.)

²Rajechiñuy nadiva Evodiayaju, rajechiñuy nadiva Sintiquejyuntiyi, nanatidye jachipiya mityijiyu Nutyityunijyu. ³Ji jerye, sitenu risa jvaanu, ritay yivara: Yajmutya nadantiy, tapi nadavitya risa jvaañujyuy mityijiyu Crimyintyuta, tavay risa jvaavventiyi, rityi datyadodara

samituchoda. Ritya jita vichada nuchara catera padyevya, jiryatiy sanuyada Vuryindenura rityá, tarijyu jnyudaju.

⁴iJiryajchanajeya Nutyityumu taarye! Rajaty jteda jiryivara: “iJiryatidye jchanay!”

⁵Jiryantya dityanu samirya jachityavayu. Nutyityu jiryinuy vutyuunu.

⁶Ne jiryajachipiya jaryi taranijyu, jiryani tuchu sisa Judenu nutyu jiryevyicha titaju, jiryajachiñuy sivara jivyatara day, jiryatuchu varyi siva: “iYentyummyate riva!”

⁷Variñi jita sabay Judenu samirya vujechiy Jesucristumu, ne vudyetya nutyichirya darya, dantamuy ne vudyetyadasarara. Jirya samirya vichadata sajnutya Judenura vujechiy jaryi jachipiyajadajisiy, vujechipiyajada jarye sajnutya taji jachipiyajadajisiy.

Vuryajachipiyasara ranijyu jiryatiy samirya

⁸Ranique tamitya jiryivara, ratyeryiveda, jiryajachipiyasara ranchiy titaju jiryatiy sitenu darya, ne quivuyada; ranchintiyi, nutyichiy vuryatuvachu simu vucyuraca, vuyntyityumu jarye, Vujemyu jarye titaju. Ranchintiyi, jiryajachipiya titaju jiryatiy samirya Judenu diyadajachera, nijyanvay diyadajache jarye; ranchintiyi, jiryatiy ne juuchatarara, jiryatiy jaryi samirya darya, jiryatiy rutay nijyanvay ranchiy: “iRani jita samirya!” Titaju, titaju jiryatiy samirya daryajura, titaju jiryatiy rutay ranchiy: “iRani jita samirya taarye!” ranchiy jita jiryajachipiyasara.

⁹Jiryajvaatyityi varidyerya jiryatiy radyetyadoda jiryerya, jiryatiy jiryimutyajadara. Daryatiy jiryetyuvachoda rimusirya, daryatiy jiryinuyada rivaay jiryedyiyara, daryaniday jiryajvaatyityirya, savicha

varyi Judenu jiryisa, nitiy bachara samirya vujechiy.

Vidípo vichada janvavyedabay sayadara tara Pávurubay jiyadaju

¹⁰⁻¹¹Richangy jita Nutyityumu jaryi, jiryatiy diyenuma jita jiryejetyi jachipiyajada ranijyuntiy. Sitenumi jiryejechipiyatityiyada ranijyu, ne vanay jiryimutyada varirye. Ritatya jitarajiryatiy rasutye tara rajyu, radyetyama daryaju Judenu jtedamuju, samirya jachipiyajada. ¹²Radyetyantirya jantyuyadamu vichadantiy, darya radyetyantirya jaryi tarati vichadantiy. Titaju ravychada rundamu radyetyadara poyada, jachijada jarye, daryantiy jaryi tarati vichada, jantyuyadamu vichadantiy.

¹³Raryi jvaay titaju Cristumu, nitiy ravanutyatityirye.

¹⁴Dañuma jiryeni jvaayada samirya, jiryatiy jiryimutyada rantuyadamu ray.

¹⁵Jiryedyetyisatya, Vidípo vichadamu vichavay, nutyu samituchoda jotada rundamu, ridedanumaty Masedóniya mucadimusiy, vinu jirye jita Judenu siitaryavayuu cabyimusiy, muttada risara cuenta, vuryatidye savuy, vuryatidye jmutya varintyirya. ¹⁶Variñi jita ravychanuyada Tesadónica vichadamu, ne vinu taraquiju jiryipajada rantuyadamu ray. ¹⁷Ne jiryajtay: “Savata ranacho mitya sayada”; rinuryu jitarasayada jiryatiy sasay Judenu jiryecheyadivayu. ¹⁸Rimutyajada jita titajura jiryatiy jiryiparara, riteda varidye: “iJaryi taratinuma jitate ray!” Epájruditu jtitada jiryimusirya, suncanuy jita Judenu varirya darya sayada, nutyu suncanuñuyadara tara sayada jinijyuntiy. ¹⁹Rindenu jita rajotanichara jiryeyu titajura jiryatiy rasutye jirye, ne jiryinuy daryaju jaryi tarati Jesucristumuni, vanda vichajomu.

²⁰iVujyē Jūdenunijyū jīta rācha vandaquite, taricharajute! iDarya ramačo tītaju!

²¹Jiryamuchuvatyityi tītaju riJesucristumu tuvachuvay, jiryisa vichavay. Risā vichavanti muchuvatye jiryentyidye. ²²Jūdenumu tuvachuvay

tītaju muchuvatyadeda jiryentyidye, rityevay jītate jiryatijamu nutyityū Sésarjsā vichavadyeryi.

²³Sāvichaniy Vuyntyityū Jesucristu samiñi vuryintu.

*Sayanuma jiryetyeryi
Pávuru*